

Umno atau '46

Analisis oleh MIOR KAMARUL SHAHID

SIAPA perlu beralah? Itulah yang dapat dirumuskan hasil Perhimpunan Agung Umno yang berakhir hari ini. Adakah Presiden Umno, Datuk Seri Dr Mahathir Mohamad yang perlu beralah atau Perhimpunan Agung Umno? Atau, adakah Umno perlu beralah atau parti Semangat 46?

Jawapan kita ialah di antara Presiden Umno dan Perhimpunan Agung Umno, Datuk Seri Dr Mahathir terpaksa beralah. Di antara Umno dan Semangat 46, parti hasil serpihan pemimpin Umno pimpinan Tengku Razaleigh Hamzah sepatutnya beralah.

Segala-galanya ini sudah diputuskan oleh Perhimpunan Agung Umno semalam apabila lebih 1,500 perwakilan membuat keputusan usul terima kasih dengan pindaan atas ucapan Presiden Umno yang merasmikan perhimpunan agung itu.

Perhimpunan Agung Umno meluluskan sebulat suara usul yang melarang parti itu daripada meminda perlembagaannya sememata untuk memenuhi tuntutan golongan tertentu yang ingin menganggotai semula Umno.

Perhimpunan itu juga meluluskan usul pindaan supaya, Presiden Umno, Datuk Seri Dr Mahathir Mohamad merujuk kepada Perhimpunan Agung Umno, jika pertemuannya dengan mana-mana pihak, membabitkan cadangan yang boleh menimbulkan apa-apa perubahan kepada parti itu.

Memang benar kata wakil Bukit Bintang, Syed Hamid Albar bahawa Umno bukan parti Dr Mahathir atau parti yang mengamalkan dasar diktator. Semua keputusan diputuskan bersama dalam perhimpunan agung. Serentak dengan kelulusan usul itu, bermakna Perhimpunan Agung menetapkan bahawa Perhimpunan Agung:

1) Memberi kepercayaan penuh dan mengucapkan tahniah kepada Datuk Seri Dr Mahathir Mohamad.

2) Memberi sokongan tidak berbelah bagi kepada kerajaan dalam usaha mengekalkan kestabilan politik, meningkatkan kemajuan ekonomi dan mengukuhkan perpaduan rakyat berbilang kaum, dan memberi jaminan akan terus menolong kerajaan mengawasi anasir yang mengancam perpaduan rakyat dan keutuhan serta keselamatan negara.

3) Memberi kepercayaan penuh kepada kerajaan dalam pelaksanaan Dasar Luar Negara.

4) Mengakui Umno yang ada sekarang ialah Umno yang sah yang ditubuhkan dengan kehendak ahli Umno yang menyertai semula Umno yang didaftarkan semula pada 13 Februari 1989 yang menyambung perjuangan Umno dan dengan itu bersejua mengekalkan perlembagaan dan struktur organisasi parti yang ada sekarang.

5) Di samping memberi keyakinan dan kepercayaan di atas kemampuan dan kebolehan kerajaan melaksana dan menjayakan tercapainya Dasar Ekonomi Baru, mendesak kerajaan memberi jaminan politik, sosial dan ekonomi kaum Melayu-Bumiputera yang lebih baik di segi dasar dan pelaksanaan sesudah 1990.

Menyedari ada sedikit kelonggaran yang wujud dalam usul itu, perwakilan mahukan Perhimpunan Agung, sebagai badan yang membuat dasar, diletakkan di peringkat paling tinggi. Kuasa yang membabitkan perubahan dalam Umno bukan terletak di tangan Presiden.

Agung Umno tidak rela Semangat 46 yang dianggap oleh kebanyakan perwakilan sudah hilang pengaruh, cuba mempengaruhi hal ehwal Umno yang sudah pulih sepenuhnya.

Meskipun begitu, keputusan Perhimpunan Agung itu tidak bermakna ia menolak terus kumpulan Semangat 46. Apa yang perlu sekarang, mereka hendaklah menganggotai Umno terlebih dahulu. Kemudian, mereka bolehlah bercakap mengenai baik buruknya mengenai Umno, sama ada mengenai dasar, pentadbiran dan sebagainya. Malah, mereka mempunyai suara untuk menentukan perlembagaan Umno.

Sebagaimana ditegaskan oleh Syed Hamid, sesiapa yang belum menjadi ahli tidak berhak mempersoalkan perlembagaan Umno. Hanya ahli parti saja yang berhak mempersoalkan perkara-perkara mengenai parti.

Oleh itu, jika golongan itu mahu juga mempersoalkan perlembagaan parti, mereka hendaklah terlebih dahulu menganggotai Umno. Dengan kata lain, kemasukan seseorang itu dalam parti bermakna mereka menerima perlembagaan, tradisi dan cara pentadbiran parti.

Memang benar, Umno bukanlah rumah kosong. Dalam rumah itu sudah ada orang. Orang luar tidak boleh masuk sesuka hati. Jika hendak masuk, perlulah beri salam terlebih dahulu. Dulu mereka meninggalkan rumah itu, bila nak balik semula perlulah jengah-jengah dari jauh, sama ada diterima atau tidak.

Biasanya orang rumah tidak menolak kedatangan seseorang kerana ia memang dibuka kepada semua orang Melayu, tetapi gunakanlah budibicara. Contoh yang paling baik ditunjukkan oleh wakil Umno bahagian Senai, Encik Adam Abdul Hamid yang dahulunya memang menjadi salah seorang kuat Semangat 46. Dalam perhimpunan agung ini beliau mencadangkan supaya semua orang Melayu bersatu melalui satu parti — Umno.

Beliau mengakui bahawa tindakannya meninggalkan parti itu dibuat selepas melihat wujudnya ciri-ciri mementingkan diri sendiri di kalangan pemimpinnya. Beliau meminta mereka yang masih terpesong itu agar kembali ke dalam Umno.

"Kesediaan Datuk Seri Dr Mahathir bertolak ansur dengan mereka amatlah dipandang mulia. Kemungkaran diatasi dengan kenyataan, kekerasan diatasi dengan sikap lembut," katanya.

Seorang lagi bekas pemimpin Semangat 46, Haji Jailani Jaafar yang mewakili badan perhubungan Umno Kelantan, turut berpeluang diberi berucap di perhimpunan agung itu.

Beliau, yang pernah menyokong Tengku Razaleigh Hamzah, berkata tindakannya meninggalkan kumpulan itu dua tahun lalu dibuat kerana pucuk kepemimpinan Semangat 46 tidak menitikberatkan perpaduan Melayu.

Baginya, kerjasama Semangat 46 dengan DAP jelas menunjukkan mereka sebenarnya tidak memperjuangkan nasib bangsa Melayu. Paling dikesalnya ialah apabila Dewan Rakyat meluluskan rang undang-undang menggunakan Bahasa Melayu di mahkamah, wakil Semangat langsung tidak hadir untuk menyokongnya. Sikap membisu sama dengan merelakan DAP untuk menentangnya. Ini adalah satu dosa kepada orang Melayu.

Amanatnya ialah Umno hendaklah berhati-hati hendak membawa masuk ahli Semangat 46. Menurutnya, janganlah Umno terlalu menunjuk-nunjuk untuk memujuk mereka, kerana ini akan membuatkan kumpulan itu "besar kepala".



Dengan itu, perwakilan menerima usul pindaan yang berbunyi:

Perkara 5: Mengakui bahawa Umno yang ada sekarang ini adalah Umno yang sah yang telah ditubuhkan dengan kehendak ahli Umno yang menyertainya semula dan telah didaftarkan semula pada 13 Februari 1988 dan menjadi penyambung perjuangan Umno yang dilahirkan pada tahun 1946, maka dengan ini bersetuju mengekalkan perlembagaan dan struktur organisasi parti yang ada sekarang.

Perkara 6: Mengalu-alukan kesanggupan Datuk Seri Presiden demi kepentingan perpaduan orang Melayu untuk mengadakan pertemuan dengan mana-mana pihak dengan syarat sebarang cadangan yang boleh menimbulkan apa-apa perubahan kepada Umno hendaklah terlebih dahulu dirujuk kepada Perhimpunan Agung.

Apakah implikasi daripada keputusan perhimpunan agung Umno ini? Disebabkan isu perpaduan dibahaskan dengan agak meluas dalam perhimpunan agung ini, sudah tentulah ia dikaitkan dengan cadangan pertemuan Datuk Seri Dr Mahathir Mohamad dengan Tengku Razaleigh Hamzah.

Kedua-dua pemimpin itu sudah menyatakan persetujuan masing-masing. Semua pihak mengalu-alukan pertemuan ini. Tetapi, nampaknya ia mungkin menimbulkan perkembangan baru. Bagi pihak Semangat 46, mereka mungkin menganggap sudah ada batas-batas pemisah yang agak jauh, manakala Datuk Seri Dr Mahathir pula mempunyai batas tertentu kerana ia tidak boleh membuat sebarang keputusan.

Apa yang nyata, Datuk Seri Dr Mahathir terpaksa mendongak ke atas kerana beliau tidak boleh membuat keputusan hasil pertemuan dengan Tengku Razaleigh nanti. Beliau hanya mungkin boleh mendengar hujah Tengku Razaleigh atau membalas hujah. Kemudian hasil rundingan perlu dirujuk ke persidangan agung.

Segala-galanya perlu dirujuk kepada Perhimpunan Agung. Malah, Majlis Tertinggi (MT) Umno juga tidak boleh berbuat apa-apa. Jika hendak dilulus keputusan Perhimpunan Agung itu, bermakna perwakilan hanya mengalu-alu pertemuan itu tetapi mereka masih ragu-ragu untuk membenarkan kemasukan ahli baru yang mewakili Semangat 46. Mungkin, selama ini mereka sudah cukup mengalami azab berikutan tindakan kumpulan itu yang merobek-robekkan Umno.

Jika andaian kita bahawa pertemuan kedua-dua mereka dapat dilakukan, sudah tentu ia hanya membabitkan perbincangan mengenai soal-soal perpaduan Melayu di luar Umno. Perhimpunan

Wakil Tanjung Karang, Selangor, Haji Shukor Haji Siraj mahukan supaya Umno jangan meminda perlembagaan parti, semata-mata kerana desakan orang di luar parti. Baginya, Fasal 7 ceraian 3 dalam perlembagaan parti mengenai cara pemilihan Presiden dan Timbalan Presiden mengikut pencalonan perwakilan bahagian tidak perlu dipinda. Cara pemilihan itu adalah adil dan sebagai penghargaan kepada bahagian.

"Begitu juga dengan fasal 7 ceraian 6 mengenai perlantikan Ketua Pemuda dan Ketua Pergerakan Wanita oleh Presiden parti tidak perlu dipinda," katanya. Katanya, pindaan perlembagaan hanya perlu dibuat apabila Umno sudah kukuh dan tidak lagi berpecah belah.

Berasaskan perbahasan selama tiga hari ini, terutama yang membabitkan perpaduan, nampaknya perwakilan masih berbelah-bagi mengenai kesediaan mereka untuk menerima golongan Semangat 46. Malah, ada antara mereka yang menganggap bekas Perdana Menteri, Tunku Abdul Rahman al-Haj sendiri tidak jujur dalam tindak-tanduknya walaupun pada hakikatnya beliau mengakui "masih sayangkan Umno".

Mereka mulai sangsi kerana mendapat tahu pada sebelah malam selepas menghadiri majlis perhimpunan agung Tunku mula membuat kenyataan yang bercanggah. Beliau dikatakan akan mengeluarkan saham bernilai \$1 juta dari sebuah akhbar untuk disumbangkan kepada Semangat 46.

Nampaknya perkembangan ini menyebabkan perwakilan mula beralih pandangan walaupun pada mulanya mereka nampak kejujuran Tunku untuk mencari penyelesaian ke arah perpaduan orang Melayu. Malah, parti yang bekerjasama dengan Semangat 46 juga dikatakan terang-terang mengatakan bahawa cadangan pertemuan itu sebagai sandiwara. Jika parti itu jujur mengeluarkan dakwaan itu, bermakna mereka juga tidak percaya dengan kejujuran Tunku. Soalnya, apakah perkembangan dalam Perhimpunan Agung Umno ini boleh mempengaruhi pilihanraya umum nanti?

Berasaskan kepada hujah perwakilan, mereka tidak bimbang dengan keadaan ini kerana menyedari bahawa parti Semangat 46 ditolak oleh rakyat berasaskan kepada tindakannya yang tidak jujur. Rumusan kita ialah Umno sudah pulih dan mempunyai kemampuan untuk menangani apa jua masalah yang dihadapinya.

perlu beralah?

18 NOV 1989

Tekun hadapi segala rintangan dan masalah

TIDAK ada jalan yang mudah untuk mencapai matlamat yang mulia. Kita perlu masa, yakni kita perlu bersabar, sambil bertekun menghadapi segala rintangan dan masalah. Kerajaan tahu dan kita semua juga tahu bagaimana orang Melayu boleh berjaya, tetapi selalunya mereka yang berkepentingan suka menggunakan politik untuk menggagalkan usaha kerajaan. Usaha mereka tidak akan berjaya jika rakyat tidak melayan orang seperti ini. Jika orang Melayu tidak mahu mengamalkan cara yang mereka tahu boleh membawa kejayaan, akhirnya kita akan menderita.

MALAYSIA — NEGARA MEMBANGUN

Negara kita belum lagi menjadi negara yang maju dan kaya. Tetapi ramai yang berlagak seolah-olah negara ini sudahpun menjadi negara maju seperti negara di Eropah dan Amerika Utara. Ramai yang mendesak supaya kerajaan membekalkan kemudahan yang bermutu tinggi. Kita hendakkan jalan raya, elektrik, air, sekolah, universiti, hospital, pelabuhan, lapangan terbang dan semua kemudahan lain seperti di negara maju. Kita tahu meniru cara negara-negara maju. Kita hendak supaya bandar kita mempunyai taman yang besar dan indah, supaya bangunan lama dipelihara, bangunan baru tidak terlalu padat dan kawasan lapang dan luas. Kita mahu hutan kita dipelihara, empangan hidro-elektrik tidak dibina, industri kita lebih bersih daripada bersih.

Kita mahu rumah murah yang besar, mempunyai tiga bilik tidur dengan bilik mandi, satu *standard* yang lebih tinggi daripada rumah yang setaraf di negara maju. Kita tidak suka rumah bertingkat. Sebaliknya di negara maju kebanyakan pekerja tinggal dalam sebuah bilik yang menjadi tempat tidur di waktu malam. Mereka tidak memiliki tempat tinggal sendiri, hanya sekadar menyewa. Apabila pendapatan sudah meningkat dan mereka berkahwin, barulah mereka berpindah ke tempat tinggal dua bilik. Peraturan rakyat negara maju yang memiliki rumah sendiri amatlah rendah berbanding dengan pendapatan tinggi yang mereka perolehi.

Tetapi di Malaysia kita mengeluh jika rumah murah tidak ada tiga bilik tidur, tidak ada halaman, tidak ada pintu belakang, tidak ada lif yang cukup besar untuk mayat dan lain-lain lagi. Sebenarnya dengan harga \$25,000 kita tidak mungkin mampu membeli sebuah bilik pun di kebanyakan negara maju dan juga negara tidak maju.

Semuanya adalah soal sikap dan nilai. Jika kita sanggup bersusah sedikit, jika kita tidak selalu menuntut berlebihan, kita tidak akan berasa tertekan dan terdesak. Kita akan mudah bersyukur seperti yang dituntut oleh agama kita. Kita tidak akan mudah dihasut dan bertindak tanpa memikir

Sambungan sedutan ucapan Presiden Umno, Datuk Seri Dr Mahathir Mohamad, ketika merasmikan Perhimpunan Agung Umno di Dewan Merdeka, Pusat Dagangan Dunia Putra pada 18 November, 1989.

bar. Yang utama bagi kita ialah perpaduan semua orang Melayu dalam Umno. Justeru itu kita membuka dengan seluas-luasnya pintu Umno. Kita terima semua mereka yang ingin menyertai pertubuhan kita dengan tidak mengambil kira latar belakang dan peranan mereka dalam menyeret Umno ke mahkamah. Ramai daripada mereka yang dahulu tidak bersetuju dengan Umno di bawah kepimpinannya sekarang, kita terima dengan hati terbuka dan kita akan terus menerima dan berusaha supaya mereka merujuk semula kepada Umno.

Baru-baru ini kita terperanjat dengan kenyataan yang dikatakan oleh Bapa Kemerdekaan dan Bapa Malaysia, Yang Teramat Mulia Tunku Abdul Rahman. Walaupun pada mulanya ramai pemimpin dan ahli Umno amat marah tetapi kita berjaya membendung rasa kecil hati kita. Sebaliknya kita bertenang dan mengambil jalan yang lebih matang iaitu dengan cara berbincang dari hati ke hati dengan Yang Teramat Mulia Tunku sendiri.

Pemuda yang biasanya lekas marah, mengambil langkah pertama di bawah pimpinan Ketua Pemuda, Datuk Najib Tun Razak. Mereka meneroka satu pendekatan yang lebih waras. Pemuda juga berjaya menjelaskan pendirian Pemuda dan Umno dan Tunku pula dapat menyampaikan niat dan cita-cita beliau kepada Pemuda, berhubung dengan perpaduan orang Melayu dan peranan yang harus di mainkan oleh Umno.


Pihak Majlis Tertinggi mendengar laporan Ketua Pemuda dan bersetuju supaya Wanita Umno juga turut berjumpa dengan Yang Teramat Mulia Tunku. Seperti mana kita semua maklum, perjumpaan Wanita dengan Tunku juga diadakan dalam suasana muhibah.

Pada 11 November pula, saya telah diterima bertemu Yang Teramat Mulia Tunku, yang saya hormati sebagai bekas Presiden Umno, sebagai bekas Perdana Menteri Malaysia yang pertama, sebagai Bapa Kemerdekaan dan Bapa Malaysia. Sudah tentu saya menghormati Tunku sebagai orang yang lebih tua daripada saya, kerana ini adalah adat bangsa Melayu, lebih-lebih lagi Tunku adalah daripada keluarga Di-Raja negeri saya.

Saya berpeluang mendengar pandangan orang Melayu dan berkenaan kedudukan dan hak kaum di Malaysia. Saya juga berpeluang menjelaskan sedikit sebanyak berkenaan kedudukan Umno sekarang dan bagaimana Parlimen tidak berkuasa membatalkan hukuman yang dibuat oleh mahkamah.

Pertemuan yang diadakan itu membuka peluang untuk perbincangan di masa hadapan dalam usaha mententeramkan lagi kea-

daan politik di Malaysia, khususnya di kalangan orang Melayu. Saya yakin bahawa Yang Teramat Mulia Tunku dapat memainkan peranan sebagai orang tengah yang tidak memihak kepada mana-mana pihak, tetapi hanya kepada keseluruhan orang Melayu dan negara Malaysia. Insya-Allah perjuangan Umno untuk menyatupadukan orang Melayu akan berhasil dengan pertolongan Bapa Kemerdekaan dan Bapa Malaysia, Tunku Abdul Rahman Putra al-Haj.



dengan lebih jauh dan mendalam. Kita tenang dan akan sanggup menghadapi cabaran hidup dengan jiwa yang teguh. Allah Subhanahu wa Ta'ala telah berjanji, jika kita bersyukur kita akan mendapat lebih banyak nikmat lagi.

Sistem demokrasi kita sekarang memberi hak kepada kita mendesak kerajaan yang kita pilih. Tetapi apabila desakan menjadi ugutan, cara ini tidak demokratik lagi. Apabila kita menyalahgunakan hak demokrasi kita, maka kita tidak akan mendapat nikmat daripada demokrasi. Demokrasi boleh membawa kebahagiaan jika kita tahu menggunakan demokrasi dengan baik. Oleh itu berhati-hatilah menggunakan hak demokrasi. Janganlah kita menggunakan demokrasi untuk menekan pihak berkuasa supaya memberi apa yang tidak mampu diberikan.

GEJALA JANJI KOSONG

Sebelum bulan April 1991, kita akan menghadapi pilihanraya. Menjelang pilihanraya kita akan digoda dan dinoda oleh orang tertentu. Mereka akan menjolok perasaan kita sehingga kita akan marah dan tidak lagi dapat menimbang sesuatu dengan fikiran yang waras. Ingatlah apa yang terjadi kepada kita apabila kita disogok dengan fitnah dan tuduhan yang tidak berasas. Tepatlah Inggeris berkata, "Beware of Greeks bearing gifts" atau "Berjaga-jagalah apabila orang Greek membawa hadiah". Wilayah Troy jatuh ke tangan orang Greek kerana mereka menerima hadiah kuda kayu yang diberi oleh orang Greek. Demikian juga dengan orang yang akan datang ketika pilihanraya untuk membuat janji yang memikat nafsu kita. Mereka sanggup membuat apa juga janji kerana mereka tahu mereka tidak akan dapat menubuhkan kerajaan yang akan bertanggungjawab menunaikan janji itu. Mereka berharap akan menang di beberapa kawasan untuk kepentingan diri mereka saja.

Apabila parti kita Umno dihukum tidak sah oleh mahkamah, kita terpaksa menghadapi bermacam-macam kesulitan dan masalah. Kita bukan saja perlu mendaftarkan semula parti kita, tetapi kita juga terpaksa menyusun semula parti supaya ia dapat bergerak seperti dulu. Ahli Majlis Tertinggi yang asal berusaha menubuhkan semula badan perhubungan negeri, bahagian dan cawangan. Ahli Umno lama terpaksa dicari untuk menghidupkan semula cawangan yang menjadi tunjang politik parti kampung.

Untuk mengelak daripada tindakan yang boleh mengharamkan parti sekali lagi, pendaftaran ahli terpaksa dibuat di peringkat pusat dengan menggunakan komputer. Tanggungjawab yang lebih berat terpaksa dipikul oleh ibu pejabat parti. Parti bukan saja memerlukan ahli, tetapi lebih penting lagi ialah simpati dan sokongan yang diberikan kepada parti oleh orang ramai. Kita bernasib baik kerana telah ada beberapa pilihanraya kecil untuk menguji sokongan rakyat berbilang kaum kepada parti kita. Alhamdulillah, daripada lapan pilihanraya kecil, enam membuktikan pengiktirafan dan sokongan rakyat kepada parti kita. Yang dua lagi pula tidak menunjukkan bahawa ada sokongan yang bermakna daripada orang Melayu kepada pihak lain yang mendakwa mewarisi Umno.

Malangnya, masalah kita tidak selesai hanya dengan kejayaan kita mendapat pengiktirafan majoriti ahli Umno ada orang Melayu serta kaum lain, bahawa parti kita adalah penyambung dan pewaris kepada Umno yang dihukum tidak sah oleh mahkamah. Masalah yang belum dapat kita atasi ialah pengambilan balik harta dan pentadbiran harta Umno daripada Pemegang Harta. Semua harta dan saham serta wang tunai Umno berada dengan Jabatan Pemegang Harta. Kita tidak boleh sentuh walau satu sen pun. Kita tidak boleh menggunakan bangunan kita sendiri tanpa membayar sewa. Walaupun hutang kita juga diambil alih, tetapi harta yang kita sudah bayar sepenuhnya pun bukan kita punya. Pusat Dagangan Dunia Putra dengan Dewan Merdeka di mana kita berada ini pun bukan milik kita lagi.

Masalah mendapat balik harta kita ini amat sukar diusahakan kerana bilangan keahlian Umno dulu yang sering kita sebut sebagai 1.4 juta sukar dibuktikan. Walaupun kita tahu daripada 1.3 juta ahli Umno sekarang, lebih 900,000 adalah ahli lama, tetapi bukti keahlian 900,000 ini sukar didapati untuk diterima oleh mahkamah.

UMNO PARTI KITA

Beban yang kita terpaksa pikul kerana orang yang mengheret kita ke mahkamah amatlah berat. Sepatutnya kita tidak memaafkan mereka. Tetapi kita sanggup membendung perasaan kita. Walaupun berkali-kali kita dikecam dan pelbagai tuduhan dibuat, kita bersa

PERHIMPUNAN AGUNG UMNO

MASA DEPAN YANG CERAH

Malaysia mempunyai masa hadapan yang cerah. Kita sudah membuktikan kemampuan kita mentadbir dan membangunkan negara kita ini. Kita mempunyai rancangan teratur yang memberi tekanan kepada semua aspek pembangunan; rohani dan jasmani, dunia dan akhirat. Kita yakin kita mampu melaksanakan rancangan kita dengan sempurna dan berkesan. Kita bukan komunis, atau sosialis atau kapitalis. Kita tidak ekstrim; yang jernih kita terima, yang keruh kita buang. Kita tidak terkongkong dengan apa-apa ideologi. Kita mengakui kelemahan yang ada pada kita dan kita cuba mengatasi kelemahan ini. Yang kita hendak ialah supaya semua rakyat Malaysia hidup bahagian, terpelihara daripada segala malapetaka ciptaan manusia dan dihormati dunia.

Rancangan kerajaan dan pengurusannya membuktikan kemampuan kita mengatasi tekanan kemelesetan ekonomi dunia dan membawa negara ke arah kemajuan sekali lagi. Kita yakin kita dapat, insya-Allah, meneruskan rancangan kita untuk menjadikan negara kita sebuah negara yang maju dengan penduduk yang berhemah tinggi dan menikmati kehidupan yang sempurna.

Kita yakin keadaan tidak seimbang antara kaum di Malaysia akan dapat kita atasi sedikit demi sedikit tanpa menjejaskan pembangunan negara. Tetapi semuanya terpulung kepada rakyat. Dalam negara yang tidak demokratik sekalipun kemajuan negara banyak bergantung kepada sikap rakyat. Inikan pula negara kita yang demokratik. Rakyat boleh menentukan stabil atau tidak stabil, maju

Kerajaan dan pemimpin parti boleh memberi panduan dan merancang. Kerajaan hanya boleh berusaha. Tetapi akhirnya rakyat yang akan menentukan nasib mereka dan nasib negara.

Dunia sekarang mengiktiraf dan menerima kemampuan Malaysia mengadakan pemerintahan yang berkesan dan mampu mengatasi masalah kemelesetan ekonomi dan pergolakan politik. Dunia tidak lagi memandang rendah terhadap Malaysia. Pendek kata, usaha kita untuk mempertingkatkan maruah agama, bangsa dan negara sudah mula berhasil.

NILAI-NILAI ISLAM

Malaysia adalah sebuah negara majmuk. Agama Islam diterima sebagai agama rasmi negara, tetapi agama lain bebas diamalkan oleh penganutnya. Agama Islam memberi kelonggaran dalam pelbagai perkara dan mengambilkira keadaan semasa. Dalam pentadbiran, yang penting ialah keselamatan dan kesempurnaan masyarakat. Inilah yang dilakukan oleh kerajaan.

Di Malaysia pentadbiran kerajaan tidak bertentangan dengan lunas-lunas Islam dan kerajaan mengambilkira keadaan semasa, termasuklah keadaan di mana ramai daripada rakyat negara ini bukan beragama Islam. Perhubungan antara orang Islam dengan bukan Islam di negara ini adalah baik dan keadaan ini mestilah dikekalkan. Alhamdulillah, Malaysia terkenal sebagai sebuah negara Islam di mana rakyat majmuknya hidup dalam keadaan aman dan damai, dan pembangunan negara berjalan dengan baik. Kita tidak boleh berbangga dengan keislaman negara jika bukan saja pembangunan tidak ada tetapi rusuhan dan peperangan berlaku.

Dalam usaha kita mengembangkan syiar Islam, kita akan sentiasa bersikap liberal dan toleran dan seperti mana yang dikehendaki oleh agama Islam tidak akan menggunakan sebarang paksaan. Antara usaha yang kita laksanakan ialah penerapan nilai Islam dalam pentadbiran dan kehidupan harian kita. Insya-Allah, dengan kejujuran dan keikhlasan, usaha kita ini akan memperolehi kejayaan.

Hari ini kita boleh berbangga dengan negara kita Malaysia. Apabila kita melihat bendera Malaysia yang tersergam indah berkibar di atas tiang yang tinggi mencahar langit, satu perasaan datang kepada kita, perasaan bersyukur bercampur bangga. Kita tidak lagi rasa terhina kerana kemunduran kita. Ini bendera kita. Ini ibu kota kita. Ini negara kita dan kita berdiri megah dalam masyarakat dunia. Insya-Allah, dengan perpaduan dan kematangan kita, akan kita majukan lagi negara yang tercinta ini.

Marilah kita jayakan perhimpunan agung kita ini. Marilah kita kukuhkan lagi semangat dan tekad kita dalam menghadapi segala cabaran dan rintangan demi agama, bangsa dan negara. Marilah kita sama-sama berdoa agar perjuangan murni Umno direstui Allah s.w.t.